



Seeta se setle



Erlina Makhalemele



Seeta sa kgale se ile sa rera ho boela sekeng sa sona. Seeta sena se ne se bona hore monga sona ha a sa se rata hohang. Se ne se bewa hole le tse ding ka tlung. Seeta se ne se batla ho ratwa le sona. Se ne se sheba ha mong a sona a ya leetong a sa se natse.





Seeta se ne se dula se lla hobane se
rwalwa feela dipuleng. Se ne se rwalwa hape
diretseng. Le ho tsamaya lehlatheng.
Tse ding di ne di rwalwa mabaleng a
bolokehileng. Di rwalwa feela ha maemo a le
matle.



Sena se ne se swabisa seeta ka mehla. Se bona hore ha se sa ratwa. Monga sona a se a se feta feela hara tse ding. Ha a apara hantle a se suthisa a se betsetsa kwana thoko. Seeta se ne se boha ha a phumula tse ding ka lerato. A di phumula hore a di rwale ha a nka leeto.





Seeta sa rera ho thoba ho ya rokwa ka lesela le letle la kgauta. Sa ipotsa dipotso hore se ka ya kae? Ho mang? Sa rera leeto le lelelele ho ya batla botle. Se ne se tla kgutla feela ha se ka boela sa eba setle. Sa lakatsa ho ipona se benya hape se phatsima.



Seeta sa ya mothong a le mong feela ya lokisang dieta motseng. Seeta sa fihla sa sheba ha motho enwa a sebetsa ka dieta. Sa bona a le makgethe a sebetsa ka lerato. Seeta sa mo kopa ka pelo e fatshe ho se thusa. Motho ya lokisang dieta a kgetha lesela le letle la kgauta leo seeta se neng se ratile.





Ke moo toro ya seeta e phethahala, sa eba setle le ho feta. Sa benya! Sa phatsima! Sa shebahala le ho feta pele. Motho ya lokisang dieta a se beha hodimo hore bohle ba se bone. Batho ba ne ba kgotsa botle ba seeta sena. Seeta sa ba motlotlo sa kena leetong ho ya hae.



Tseleng seeta se ne se bina ha monate, pina
ena:

“Ke nna feela seeta se setle”


“Sefubeng ke kgauta.”

“Ke bina ho feta leeba.”

“Ke siile lehae ke sa ratwe.”

“Ke motle. Ke seilatsatsi.”

“Jowee! Nna wee!”







Leeba le ne le mametse seeta ha se tsamaya se bina. Leeba la fofela pela seeta la re: “O bina ha monate feela o ke ke wa bina ha monate ho feta nna, le ha o ka leka! O mabenyane, o a phatsima, feela ho bina, hohang lebala! Seeta sa se ke sa natsa leeba ka ha se ne se thabile haholo. Ho ne ho se se ka kgathatsang moya wa sona.



Seeta sa tsamaya leeto leo la sona se lebile hae. Sa feta pela noka. Sa tsamaya butle se sa batle ho silafala. Sa nanya thoko le metsi haholo. Seeta sa tsamaya se bina pina ya sona. Se ne se thabile se bososela.





Seeta sa fihla moo ho tletseng seretse. Sa qakeha hore se tlo feta kae. Se sa qakehile jwalo leeba lane balakatha! Ke ne ke latela pina mme ya nyamela. Molato ke eng?”

“Leeba, nnake, ke tsietsing. Ke batla thuso.”



'Ke leetong le yang hae mme ha ke batle ho silafala. Bona feela seretse se tletseng mona. Ke kopa thuso.' Leeba la phamola seeta! La se phamola la fofa ka sona ho feta seretseng. Seeta sa leboha leeba haholo. Seeta sa tloatlola ke thabo.





Seeta sa fihla hae se sa thabile. Se sa silafala, se sa phatsima le ho benya. Mong a sona o ne a maketse. A bona hore ke seeta sa hae feela a sa kgolwe mahlo a hae. O ne a maketse feela empa a thabile.



Dieta tse ding di ne di thabetse seeta sena le tsona. Tsa hata butle, tsa tsama-tsamaya ka mosito hobane di amohela seeta sena ka thabo. Tse ding tsona di ne di le mona. Di sa thaba ho hang ho bona seeta se phatsima ke kgauta.





Monga seeta a qala ho rata seeta hape. A tsamaya ka sona, a se rwala ho ya dibakeng tse bohlokwa. Leeto la pele, a se rwala ho ya konsarateng ya mmino. Moo ho kopana dihlopha tse ngata tsa dibini. Bohle ba babatsa botle ba seeta sena. Seeta sa nna sa bososela feela. Sa bina pina ya sona:

“Ke motle. Ke seilatsatsi.”

“Jowee! Nna wee!”



Leetong le latelang ba ya phakeng. Teng ho ne ho na le dimelekorone. Ho tletse banana le bashemane. Seeta sa nahana hore se tla silafala ka ha ho ne ho thunya lerole. Kanthe monga sona o tla emela kwana hole le marole.

Bohle ba babatsa botle ba seeta sena. Seeta sa nna sa bososela feela. Sa bina pina ya sona:

“Ke motle. Ke seilatsatsi.”

“Jowee! Nna wee!”





Leeto la boraro la ba lebisa moketeng wa lenyalo. Teng ho ne ho binwa dipina tse monate tsa lenyalo. A hlaha mosadi ka seeta se benyang sa kgauta. Batho ba qetella ba se ba sa bine, haesale ba tonetse seeta sena mahlo. Monyadi le monyaduwa ba sala ba maketse. Batho ba babatsa botle ba seeta sena. Seeta sa nna sa bososela. Sa bina pina ya sona:

“Ke motle. Ke seilatsatsi.”

“Jowee! Nna wee!”



Seeta e ne e se e le mamoratwa. Seeta le mong a sona ba boela ba leba lewatle ka leeto le leng. Seeta sa nahana hore se tla silafala. Feela mong a sona a emela thoko mane. A se ke a atamela lebopong. A se sireletsa ho silafala. Seeta sa nna sa bososela feela. Sa bina pina ya sona:

“Ke motle. Ke seilatsatsi.”

“Jowee! Nna wee!”





Mantsiboya a mang le a mang monga seeta o ne a se phumola. A se phatsimisa hore kgauta e benye haholo. Seeta sa bona se ratwa le sona. Sa thabela ho kgaba le ho ba mokgoping le tse ding.

Seeta sa nna sa bososela feela. Sa bina pina ya sona:

“Ke motle. Ke seilatsatsi.”

“Jowee! Nna wee!”



Monga seeta a se rwala ho ya moo ho lokiswang dieta. Yena le seeta sa hae ba leboha monna ya lokisang dieta haholo. Monga seeta o ne a thabetse ho ba le seeta se setle ha kaalo. Seeta sa leboha haholo ha se kgutliseditswe sekeng.

Seeta sa nna sa bososela feela. Sa bina pina ya sona:

“Ke motle. Ke seilatsatsi.”

“Jowee! Nna wee!”

